


Святые земли наша, молитве Бога о нас!



СЛУЖБА СОБОРУ КАЗАНСКИХ СВЯТЫХ

МЕСЯЦА ОКТЯБРЯ 4-Й ДЕНЬ
17 ОКТЯБРЯ Н.СТ.

Святые земли наша, молитесь Бога о нас!

Месяца октября в 4-й день

Всех святых, в земли Казанстей просиявших

На малой вечерни

Поем службу святым Гурию и Варсонофию ради обретения их честных мощей.

На Господи, воззвах: стихиры святых, глас 1.

Подобен: Небесных чинов:

Взясте на рамо крест Христов,/ и распястесь миру, преподобнии,/ и последовасте стопам создавшего от не сущих вся, Божия Слова./ Егоже молитесь, да приимем грехов прощение,/ и наследницы будем жизни вечныя.

Явистесь сокровище добродетелей,/ и презресте вся яже в житии красная,/ Христовою любовию распалаемы,/ ищущи яже Богу угодная./ И Того ради бысте жителе Царства Небеснаго, и о нас молитесь, да будем и мы тому сопричастницы.

Безстрастия бывше краснии сосуди, отцы преблаженнии,/ и чудес источницы,/ монашествующих столпи крепцыи, демонов прогонители/ и страстей целители,/ да почтутся песньми,/ наставницы наши премудрии:/ и молят Христа да спасет души наша.

Слава, глас 6:

Кто доволен похвалити таковыя святители,/ возсиявшыя напоследок лет;/ благодатию бо Святаго

Духа,/ чудес исцелений дар приемше от Бога,/ и своих телес нетление,/ нам же у Христа просят грехов прощения/ и велия милости.

И ныне, Богородичен, глас тойже:

Мати Божия Пречистая,/ образ Свой, яко дар пресвят земли Казанстей давая/ и тем многих исповедников Сына и Бога Твоего укрепившая,/ Заступнице Усердная, люди Твоя не остави.

На стиховне стихиры, глас 2.

Подобен: ДOME Евфрафов:

Земле Русская,/ граде святой,/ украшай твой дом,/ в немже Божественный/ велий сонм святых прослави.

Стих: Господи, Господь наш,/ яко чудно Имя Твое по всей земли.

Земле Русская,/ красуйся и ликуй,/ се бо чада твоя/ Престолу Владычню/ во славе предстоят, радуящися.

Стих: Святым, иже суть на земли Его,/ удиви Господь вся хотения Своя в них.

Соборе святых русских,/ полче Божественный,/ молитесь ко Господу/ о земном отечестве вашем/ и о почитающих вас любовью.

Слава, глас и подобен тойже:

Новый доме Евфрафов,/ уделе избранный,/ Русь Святая,/ храни веру Православную,/ нейже тебе утверждение.

И ныне, Богородичен, глас тойже:

Аще и горение велие града Казани/ яви нам зрак
лика Твоего, Дево Пречистая,/ обаче Заступница
Усердная земли наша явилася еси,/ Мати Божия,
христиан похвало.

Тропарь святых, глас 4: Днесь, яко солнце
пресветлое: *писан на велицей вечерни*

На велицей вечерни

Блажен муж:1-й антифон. На Господи, воззвах:
стихиры святых на 8, глас 1:

Подобен: О, дивное чудо:

О, дивное чудо!/ Велие торжество явися земли
нашей:/ собор святых прославляется,/ и предстателие
ко Христу сии бывают./ Веселися, граде Казанский,/
имея в себе лучи сияющия, святыя твоя./ Возопиим,
вернии:/ радуйтеся, заступницы наши,/ вы бо молитесь
спастися верою вас почитающим.

Твое славим торжество, святителю Гурие,/
свещами златозарными град твой украшается/ и
песньми духовными днесь исполняется./ Радуются
людие земли Казанския,/ воспевающе днесь собор
святых своих/ и, светолепно праздник совершающе,/ со
архангелы и ангелы ликовствуют:/ радуйтеся,
заступницы наши,/ похвало и утверждение,/ молитесь
за ны, спастися душам нашим.

Дивны Твоя тайны, Богородице,/ явилася еси,
Владычице, во граде нашем/ и образом Твоим радость
возсия нам./ Припадают Тебе ныне наши сродницы:/
святителие, преподобнии и праведнии,/ исповедницы и
мученицы./ Возвеселимся, вернии, днесь и воспоем:/
радуйся Заступнице наша, христианом Похвало и
Утверждение,/ молися за ны спастися душам нашим.

Ины стихиры, глас 2.

Подобен: Киими похвальными:

Киими похвальными венцы/ восхвалим земли
Казанския первыя просветители/ предивныя Гурия,
Варсонофия и Германа,/ предстатели и заступники
наши,/ семена спасительнаго учения сеятели
равноапостольныя/ Христова Евангелия путеводцы
истинныя?/ Ихже ради прежде темный град озарися
светом богопознания/ и Христос прославися,/ имей
велию милость.

Киими песенными пении/ похвалим святителей и
мучеников земли нашея/ Ермогена, Патриарха
Российскаго,/ Кирилла, Анатолия, Иоасафа и
Амвросия?/ Исповедники веры Православныя,/
архиерейства жезлы добрыя преизящныя,/ мучеников
крепкия поборники,/ яко житием своим верность
Христу показаша,/ имеющему велию милость.

Киими похвальными венцы/ увязем мученики
наша/ Авраамия, Иоанна, Стефана и Петра?/ Прежде
просвещения града Казани первыя лучи,/ четверица

мученическая преславная,/ Небеснаго Царствия
доблии граждане,/ ихже в Своя обители Христос
прият,/ имей велию милость.

Киими песненными добротами/ воспоим
новомученики и исповедники наша,/ Дмитрия,
Филарета, Михаила и Павла,/ во священницех Христу
потрудившиися,/ таже преподобномученики
преславныя/ во обителях подвизавшиися?/
Благоуханныи цветы вертограда Небеснаго,/ ихже
насади Христос Бог наш,/ имей велию милость.

Киими духовными песньми/ похвалим Гавриила и
Александра?/ Служители Господни изрядныя,/
монахом наставники и ангелом собеседники,/ во
бранех духовных человеком поборники,/ града Казани
светлая удобрения,/ Пастыреначальника Христа
подражатели,/ подающего нам велию милость.

Слава, глас 8:

Да прославится днесь собор святых,/ в земли
Казанстей Богу угодивших:/ славнии святителие и
просветителие,/ таже священномученицы и
исповедницы,/ кровь свою за Христа излившии,/ еще
же преподобнии и праведнии,/ именованныи и
неименованныи,/ покровом Матере Божия,
Заступницы Усердныя/ в земли сей утверждении.

И ныне, Богородичен, глас 8: Царь Небесный:

Вход. Прокимен дне. И чтения три:

Пророчества Исаиина чтение

(Гл. 43, ст. 9-14):

Тако глаголет Господь: вси языцы собращася вкупе, и соберутся князи от них. Кто возвестит сия в них? Или, яже от начала, кто слышана сотворит вам? Да приведут свидетели своя, и оправдятся, и да услышат, и да рекут истину. Будите Ми свидетели, и Аз Свидетель, глаголет Господь Бог, и отрок, егоже избрах. Да познаете, и веруете Ми, и разумеете, яко Аз есмь, прежде Мене не бысть ин бог, и по Мне не будет. Аз есмь Бог, и несть, разве Мене, спасаей. Аз возвестих и спасох, уничижих, и не бе в вас чуждий. Вы Мне свидетели, и Аз Господь Бог, и еще от начала Аз есмь, и несть от рук Моих избавляй. Сотворю, и кто отвратит то? Сие глаголет Господь Бог, избавляй вас, Святой Израилев.

Премудрости Соломоновы чтение

(Гл. 3, ст. 1-9):

Праведных души в руке Божией, и не прикоснется их мука. Непщевани быша во очесех безумных умерети, и вменися озлобление исход их. И еже от нас шествие — сокрушение, они же суть в мире. Ибо пред лицом человеческим аще и муку примут, упование их бессмертия исполнено. И в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющийся Нань разумеют истину и вернии в любви пребудут Ему, яко

благодать и милость в преподобных Его и посещение во избранных Его.

Премудрости Соломоновы чтение

(Гл. 5 ст.15 – гл. 6, ст. 3):

Праведницы во веки живут, и в Господе мзда их, и попечение их у Вышняго. Сего ради примут Царствие благолепия и венец доброты от руки Господни, зане десницею покрывает я и мышцею защитит их. Приимет всеоружие рвение Свое и вооружит тварь в месть врагом. Облечется в броня правды и возложит шлем — суд нелицемерен. Приимет щит непобедимый — преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят, и от каменометныя ярости исполнь падут грады, вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навькните, судии концев земли, внушите, держащая множества и гордящияся о народах язык. Яко дана есть от Господа держава вам и сила от Вышняго.

На литии стихиры, глас 2:

Припадем с любовию к преславному святителем Господним/ Гурию, Варсонофию и Герману,/ первым

просветителем земли Казанския,/ таже воспоим пречуднаго Ермогена,/ святителя, исповедника и Патриарха Российскаго.

Помолимся усердно страстотерпцем Казанским,/ святым мучеником Авраамию, Иоанну, Стефану и Петру,/ имя Христово дерзновенно исповедавшим,/ таже воспоим собор новомученик и исповедник,/ кровию своею землю оросившия/ и заступники наши усердныя явльшиися.

Воспоим и почудимся подвигом же, слезам и молитвам,/ яже преподобнии отцы Казанстии,/ Гавриил и Александр преславнии,/ с преподобными отцы Зилантовыя и Раифския обители Богу принесоша,/ таже плод духовный в земли сей возрастиша.

Слава, глас 6:

Собор святых земли Казанския усердно взывает ко Господу,/ да сохранит и избавит Спас мира Христос народ православный,/ во всех концах вселенныя,/ молитву о спасении приносящих.

И ныне, Богородичен, глас тойже:

Прославим, верни, обрадованную Богородицу,/ се бо во устех наших имама всегда святое и благословенное имя Ея,/ непрестанно прибегающе к пречистей Ея и цельбоносней иконе:/ Тою бо обретаем, яже на земли вся благая и полезная,/ и сущих на

воздусе от демонов запинаний избавляемся,/ яко Мати рождшая всех Творца,/ спасает от бед души наша.

Молитвы на литии:

Спаси, Боже, люди Твоя и благослови достояние Твое, посети мир Твой милостию и щедротами, возвыси рог христиан православных и низпосли на ны милости Твоя богатая: молитвами Всепречистыя Владычицы наша Богородицы и Приснодевы Марии: силою Честнаго и Животворящаго Креста: предстательства честных Небесных Сил безплотных: честнаго славнаго Пророка, Предтечи и Крестителя Иоанна: святых славных и всехвальных апостол: иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго: иже во святых отца нашего Николая, архиепископа Мир Ликийских, Чудотворца: святых равноапостольных Мефодия и Кирилла, учителей Словенских, святых равноапостольных великаго князя Владимира и великия княгини Ольги: иже во святых отец наших, святителя Михаила, перваго митрополита Киевскаго, первосвятителей Московских и всея Руси, Петра, Алексия, Ионы, Макария, Филиппа, Иова и Тихона, святых, в земли Казанстей просиявших:

Святителей Гурия, Варсонофия и Германа Казанских чудотворцев, Филарета, митрополита Киевскаго, святых священномучеников: Ермогена, Патриарха Московскаго и всея Руси чудотворца,

Кирилла, митрополита Казанскаго, Анатолия, митрополита Одесскаго, Иоасафа, епископа Чистопольскаго, Амвросия, епископа Свияжскаго, Алексия, архиепископа Омскаго, Никиты, епископа Орехово-Зуевскаго, Димитрия и Филарета, пресвитеров Казанских, Михаила, пресвитера Чистопольскаго, Павла, пресвитера Елабужскаго, преподобных и богоносных отец наших: Макария Желтоводскаго, Свияжскаго чудотворца и Гавриила, старца Седмиезернаго, святых преподобномучеников Зилантовых: Сергия, Лаврентия, Серафима, Феодосия, Леонтия, Стефана, Георгия, Сергия, Илариона и Иоанна, преподобномучеников Раифских: Иосифа, Сергия, Антония, Варлаама, Иова и Петра, святые преподобномученицы Маргариты, игумении Мензелинской, преподобноисповедника Александра Седмиезернаго, святых славных и добропобедных мучеников Авраамия Болгарскаго, Иоанна, Стефана и Петра Казанских, святых благоверных князей Феодора, Давида и Константина Ярославских чудотворцев, и всех прочих святых, в земли Казанстей просиявших, ихже имена Ты Сам, Господи, веси, ихже и память ныне совершаем, святых праведных Богоотец Иоакима и Анны и всех святых, молим Тя, Многомилостиве Господи, услыши нас грешных, молящихся Тебе, и помилуй нас.

Владыко Многомилостиве, Господи, Иисусе Христе, Боже наш, молитвами Всепречистыя Владычицы нашея Богородицы и Приснодевы Марии,

силою Честнаго и Животворящаго Креста, предстательства честных Небесных Сил безплотных, честнаго славнаго Пророка, Предтечи и Крестителя Иоанна, святых славных и всехвальных апостол, святых славных и добропобедных мучеников, преподобных и богоносных отец наших и всех святых, в земли Казанстей просиявших, ихже и память ныне совершаем, святых праведных Богоотец Иоакима и Анны и всех святых Твоих, благоприятну сотвори молитву нашу, даруй нам оставление прегрешений наших, покрый нас кровом крилу Твоею, отжени от нас всякаго врага и супостата, умири нашу жизнь, Господи, помилуй нас и мир Твой, и спаси души наша, яко Благ и Человеколюбец.

На стиховне стихиры, глас 5.

Подобен: Радуйся:

Радуйтесь, древнии святителие,/ святии сродницы наши,/ цвети духовнии земли Казанския,/ похвало наша и утверждение,/ тихое пристанище,/ сокровище церковное,/ стопы и словеса апостольская,/ жития же ваша и многая чудеса/ прославляют прославльшаго вас Господа,/ Егоже прилежно молитте/ даровати душам нашим велию милость.

Стих: Честна пред Господем/ смерть преподобных Его.

Радуйтесь, светильницы многосветлии,/ священномученицы архипастыри и пастыри наша,/

врачеве духовнии,/ недугующим отрада и скорбящим
утешение,/ обуреваемым пристанище немятежное,/
столпи церковнии, верных утверждение,/ за ны Христа
Бога молитесь,/ даровати нам велию милость.

Стих: Блажен муж, бояйся Господа,/ в заповедех
Его восхощет зело.

Радуйтесь, преподобнии отцы,/ заступницы наши
и хранителие,/ Духа Святаго сосуди избранныи,/ земли
Казанския утверждение/ благочестия столпи
непоколебимии,/ правило веры и образ благочестия./
Вы бо новыя исповедницы и мученицы,/ кровьюми
вашими землю нашу озаряете,/ подвиги вашими
обители освящаете./ Темже священную вашу память
совершающим,/ Христа Бога молитесь/ даровати душам
нашим велию милость.

Слава, глас 6:

Иже прежде темный,/ ныне же просвещенный град
Казань радуется,/ имея в себе святые заступники своя,/
лучезарныя молнии Господни,/ имиже агарянская
лесь разрушися/ и сей край восточный земли Русския
просветися,/ мнози святии Господни тогда явишася,/
славу Церкви Христовы возвещающии.

И ныне, Богородичен, глас тойже:

Да радуется обитель Твоя, Богородице,/ водное
естество семи езер да ликовствует днесь,/ яко Твоего,
Чистая, честнаго образа пришествием град наш
спасается,/ раби Твои болезней исцеление приемлют/ и

к Тебе, Чистая, взывают:/ радуйся, врачевство наше неоскудное,/ горьких недугов избавляющее,/ радуйся, скорбящим Божественное веселие,/ и Живоносный Источник святости,/ радуйся, многосветлая Звезда,/ иконою Твоею нас озаряющая,/ радуйся, основание Казанская обители,/ Тобою бо, Всечистая хвалимся и в нуждах прибегаем.

**На благословении хлебов тропарь святых, глас 4
дважды:**

Днесь, яко солнце пресветлое,/ возсия земля Казанская,/ в ней бо память собора святых ея совершается/ и Церковь псалмы и песнями духовными украшается,/ прославляющи святители и благовестники своя,/ мученики, исповедники и чудотворцы,/ преподобныя мужи и жены,/ праведныя и вся святыя,/ иже, купно во славе вечней предстоят/ и с Заступницею Усердною молятся Христу Богу// спастися людем своим.

**Вместо Богородице Дево: поем тропарь сей
единожды:**

Заступнице усердная,/ Мати Господа Вышняго,/ за всех молиши Сына Твоего, Христа Бога нашего,/ и всем твориши спастися/ в державный Твой покров прибегающим./ Всех нас заступи, о Госпоже Царице и Владычице,/ иже в напастех и в скорбех, и в болезнях, обремененных грехи многими,/ предстоящих и молящихся Тебе умиленною душою и сокрушенным сердцем,/ пред пречистым Твоим образом со слезами/

и невозвратно надежду имущих на Тя,/ избавления
всех зол,/ всем полезная даруй/ и вся спаси,
Богородице Дево:/ Ты бо еси Божественный Покров
рабом Твоим.

На утрени

На Бог Господь: тропарь святых, глас 4: Днесь яко
солнце пресветлое: дважды. Слава и ныне: Заступнице
усердная:

По 1-м стихословии седален, глас 3.

Подобен: Дева днесь:

Днесь Церкви Русския торжество и града нашего
веселие,/ се бо паства Казанская святыми своими, яко
златом нетленным, хвалится/ и памятью их
благоухает./ Тии бо, во славе Царствия Небеснаго
пребывающе,/ за ны молят Всемилостиваго Бога,/ да
подаст мирови велию милость.

Слава, ин седален, глас 5:

Яко солнце светозарное,/ возсия днесь память
твоя, святителю и исповедниче Кирилле,/ лучами
озаряющи верных сердца,/ к прославлению дивнаго во
святых Своих Бога,/ даровавшаго тебе крепость во
исповедании и терпение в скорбех,/ не премолчи о нас,
угодниче Христов,/ и избави нас от всякаго зла,/
Церковь Русскую сохрани от раздоров и нестроений,/
мир мирови испроси/ и душам нашим велию милость.

И ныне, Богородичен, глас 4:

Днесь светло красуется Раифская пустынь,/ яко зарю солнечную, от востока возсиявшую, восприимши, Владычице,/ чудотворную Твою икону,/ еюже разгоняеши мглу искушений и бед от вопиющих верно:/ избави обитель нашу и вся страны христианския от всех навет вражиих/ и спаси души наша,/ яко Милосердная Заступница рода христианскаго.

По 2-м стихословии седален, глас 1.

Подобен: Гроб Твой:

Приидите, вси вернии, святителя Ермогена восхвалим,/ звезду, от града нашего возсиявшую/ и всю землю Русскую Православием веры озарившую,/ и ныне звезду нову на славных небесех в сонме священномученик явленную,/ в помощь Церкви и отечеству противу врагов наших/ и во утверждение веры отцев наших:/ Господи, молитвами святителя, мир Твой подаждь нам/ и велию милость.

Слава, ин седален, глас 5.

Подобен: Радуйся:

Иоасафе, священномучениче Христов,/ твердый и мужественный исповедниче,/ святителя Кирилла сподвижниче,/ земли Казанския похвало,/ пастырю добрый, положивый душу за паству свою,/ моли Христа Бога,/ яко да милостив нам будет в День Судный.

И ныне, Богородичен, глас тойже:

Кий дар принесем Ти, Пречистая?/ Кия достодолжныя песни воспоим пред святыми Твоими иконами,/ Заступнице наша и Мати Всеблаженная?/ Аще и град Твой не оставляеши,/ егда нечестивии людие, образ Твой не почете,/ расхитиша обитель Твою и лика Твоего цела не оставиша,/ тогда не токмо люди града нашего,/ но вся христианы восплакашася и возрыдашася./ Ты же чрез святителя Константина града утешение дарова нам,/ новое торжество нам являющи,/ мы же, любовию чтуще честную икону Твою,/ Тебе песнословим вси в радости:/ радуйся, Дево Честная, Всеблаженная.

Величание:

Величаем вас,/ вси святии, в земли нашей просиявшии,/ и чтим святую память вашу,/ вы бо молитте о нас/ Христа, Бога нашего.

Псалом избранный:

1. **В**си языцы воспещите руками, воскликните Богу гласом радования.

2. **К**нязи людстии собращася с Богом Авраамлим, яко Божии державнии земли зело вознесошася.

1. **В**елий Господь, и хвален зело, во граде Бога нашего, в горе святей Его.

2. **Р**ечная устремления веселят град Божий, освятил есть селение Свое Вышний.

1. Господи, кто обитает в жилищи Твоем? Или кто вселится во святую гору Твою?

2. Ходяй непорочен и делаяй правду, глаголяй истину в сердце своем.

Посем: Слава, и ныне: Аллилуиа (трижды). И паки поем величание.

По полиелее седален, глас 5:

Красуйся, светися, земле Казанская,/ яко имаши в себе святых своя,/ основание твердое веры Православных,/ камень краеугольный и луч светлый Евангелия Божественнаго/ собор святых сродник наших бысть,/ ихже любовь почитаем.

Слава, глас 6:

Иже прежде неверием помраченный,/ ныне же верою ко Христу просвещенный,/ преславный град Казань вами хвалится,/ имея в себе мощи ваша нетленные,/ троице честная, Гурие, Германе и Варсонофие,/ отцы наши преподобнии,/ вы бо с верою приходящим источаете чудеса/ и подаете неоскудно исцеления/ любовь святую вашу память почитающим.

И ныне, Богородичен, глас 8:

Приидите, возрадуемся Державней Заступнице рода нашего, Царице Богородице./ Приидите, к тихому Ея и чудному, почитаемому ангелы, честному поклонимся образу,/ дарует бо верным обильныя дары

целебныя,/ от неистощимаго источника святых иконы неоскудную благодать источающа;/ тьмы избавляет нас искушений и бед, и всякаго греха,/ благочестно и богоприятно прославляющих и чтущих светлую и чудную Богоматере святую икону./ Тем, воспевающе, воззовем Первообразней:/ радуйся любезная миру помощи,/ во спасение душ наших.

Степенны, 1-й антифон 4-го гласа. Прокимен, глас 4: Радуйтесь, праведнии, о Господе, правым подобает похвала. Стих: Буди, Господи, милость Твоя на нас, якоже уповахом на Тя. Всякое дыхание: Евангелие от Матфея, зачало 10.

По 50-м псалме стихира, глас 6:

Соберемся, людие,/ милостивое смотрение Божие восславити,/ изволи бо Господь наш землю Казанскую просветити;/ темже подвижников Христовых прославим:/ святителей чудных,/ мучеников древних,/ таже новомучеников и исповедников преславных,/ преподобных, и праведных, и всех святых,/ край сей освятивших помощью Господа нашего/ и благодатию Его.

Канон Богородице со ирмосом на 6, глас 8: Колесницегонителя фараона: из Октоиха. Канон святым на 8, глас 5, егоже краегранесие: Сродник своих память пою.

Песнь 1

Ирмос: *Величаваго фараона в мори потопивша со оружием и всадники,/ Израиля же преславно спасша/ и по суху проведша, // поем Христа, яко прославися.*

Припев: **В**си святии земли наша, молитте Бога о нас.

Песньми благовосхвалити хотящу память вашу,/ блаженнии сродницы наши,/ светоносную ми зарю, святии, с Небесе низпослите.

Святии вси, иже землю Казанскую прежде ея просвещения именем Христовым освятивше,/ святителие Христовы и исповедницы,/ ихже достойно исчислити не можем,/ молитву вашу сотворите о братьях ваших страждущих, молим вы.

Величие наше и похвала ты еси, Гурие первый архипастырю наш:/ тобою бо многия неверныя ко Христу обратишася./ Ныне молися за род и роды, ихже Богу привел еси, // поющи Его, яко прославися.

Первый сеятель был еси духовных добродетелей,/ и первый пастырь, и Церкви начальник,/ первый архиерей и учитель христианскому закону в новопросвещенном граде Казани, явился еси,/ Гурие равноапостольне.

Храм первопрестолен Богородичен явился во граде нашем/ труды твоими, Гурие, / Благовещению Пречистыя посвящая,/ идеже и мощи твоя положени суть,/ донныне чудеса источают.

Песнями и пении духовными восхвалим святителя Гурия/ и, припадающе к честней и многоцелебней раце его,/ с любовью обლობызаем ю и сие воспоем:// радуйся, мироточе наш, молитвенниче о граде твоём неусыпный.

Богородичен: Днесь радость Благовещения во граде нашем бывает,/ егда новый Гавриил божественный Гурий Евангелие Христово благовестует/ и церковь престольную в честь Пречистыя нам устрояет,/ безсеменное Рождество от Девы Чистыя со Архангелом воспоем:// радуйся Благодатная, Господь с Тобою.

Катавасия: *Отверзу уста моя:*

Песнь 3

Ирмос: *Державною рукою и сильным словом небо и землю сотворил еси,/ юже Твоею Кровию искупил еси, Церковь Твою,/ яже о Тебе утверждается, зовущи:/ яко несть свят, разве Тебе, Господи.*

Державною рукою, и мудрыми словесы,/ и сильным словом учил еси,/ преславный Варсонофие,/ первый просветителю града Казани,/ монах предивный по избытии плена агарянского явился еси,/ таже отцем иноков содеявся,/ моли спастися душам нашим.

Святителю Варсонофие преподобне,/ первый устроитель жития монашескаго во граде Казани явился еси/ и, красну обитель Спасова Преображения

воздвигнув,/ в законех жизни духовныя чадом твоим преславно светил еси.

Край Казанский солию учения Христова просветил еси,/ святителю Германе,/ таже во граде Свияжске обитель Богоматери создав,/ добр учитель явился еси, святе.

Престол Казанский по святем Гурии наследовав,/ добр пастырь и просветитель людем новым явился еси,/ святе Германе премудре,/ таже, храмы Божия в земли Казанстей умножив,/ на высшее служение восхищен был еси.

Радуйся, святителю Филарете,/ не токмо Киеву граду, но и зде мног плод принесл еси,/ просветителю языков, устроителю храмов, алчущих питателю,/ Гурия, Германа и Варсонофия святых ревностный почитателю/ и к Богу за люди молитвенниче.

О, троице равноапостольная всечестная,/ древнии наши учителя и первии архипастырие,/ Гурие, Варсонофие и Германе со святителем Филаретом/ и прочиими святыми земли наша ныне прославляетея.

Богородичен: Пречистая Твоя икона, Богородице Дево,/ врачевство всему миру духовное:/ к нейже прибегающе,/ Тебе поклоняемся, и почитаем, и лобызаем, и чтим,/ исцелений благодать почерпающе от нея,/ и недуг телесных, и душевных страстей,/ Твоими молитвами свободяемся.

Катавасия: *Твоя песнословцы:*

Седален святых, глас 8:

Приидите, казанстии людие,/ принесите ныне пение и моление своему первосвятителю/ и воспойте ему красное от души хваление:/ той бо начаток бысть проповеди Божественныя агаряном,/ просветитель во тьме сидяшим,/ заблуждшим наставник и руководитель ко спасению,/ многия привел ко Христу Богу./ Емуже аще и выну на Небесех предстоит,/ обаче и земная посещает,/ и на праздник свой от Горних приходит,/ и возвеселяет собранныя люди своя,/ зрит покланяющияся святому образу Его/ и слышит молитвы молящихся/ и приносит я ко Владыце./ Единогласно убо воззовем к нему:/ о великий отче наш, святителю Гурие,/ никогдаже остави нас, чад твоих,/ но посещай всегда милостию твоею/ и молитвами твоими соблюдай нас,/ буди с нами, и никтоже на ны.

Слава, ин седален, глас 6:

Ни святитель быв, ни мученик земли нашея,/ ни пророк и ни апостол,/ но храмы наша именем твоим хвалятся,/ святе праведне Иоанне, пастырю Кронштадтский,/ стопы своими, освящая волжский путь/ и словесных овец научая,/ до града нашего достигл еси,/ цевнице духовная, проповедниче покаяния,/ служителю Божественных Таин благоговейный.

И ныне, Богородичен, глас тойже:

Людие благочестивии,/ правовернии собори
христоименитии,/ приступите верно вси,/
божественному припадающе Божия Матере образу:/
Тая бо исцеление болящим радостно подает,/ уязвляет
же злославныя, яко стрела от лука,/ нас всех веселит
световидно/ и благодатию озаряет молитвами Своими.

Песнь 4

Ирмос: *Духом Божиим очищся пророк, дышающим
в нем,/ Аввакум божественный, бояся, глаголаше:/
внегда приблизатся лета, познан будеши, Боже,/ на
спасение человеков.*

Дух Божий почи на тебе,/ яко на пророцех древле,
святителю Ермогене досточудне,/ первоиерарше
Церкве Российския,/ таже залог спасения ея и всего
отечества,/ егда брань тяжкая постиже землю нашу,/
первый положил еси молитвы, слезы и прещения твоя,/
избавителю от врагов готовейший.

Икону явльшуюся Пресвятая Богородицы
Заступницы Усердныя/ на длани своя приял еси,
святителю Ермогене,/ первое же пение молебное пред
нею сотворил еси,/ темже ты ублажаем, преславне.

Сигор ли гору наречем ты, Ермогене?/ Егда
спасается и угонзает страна Российская от неправд и
беззаконий и многих нестроений,/ тогда буди советник
мудрый и предстатель о нас,/ отрасли Казанская.

Патриарха Тихона споспешниче,/ Петра
крепчайшаго сострадальче,/ звезда путеводна Церкви

Русстей явился еси,/ с сими ныне Небесныя славы
наслаждаешися/ Христов мучениче, Кирилле
святителю.

Страдания многая претерпел еси, отче Кирилле,/
клеветы, суды, заточения,/ предательства лжебратий и
угрозы смертныя,/ таже насильства и нападения врагов
Церкве Христовы,/ новомучениче земли Русския.

Твое крестоносное в вере стояние/ от смуты и
раскола Церковь Русскую спасло есть./ Имя твое бысть
образ победы духовныя,/ юже соверши единство
святых мученик,/ тобою хвалится земля Казанская,/
прехвальне Кирилле, отче наш.

Богородичен: **С** чинми ангел, Владычице,/ со
пророки, и апостолы, и со всеми святыми/ за ны,
грешныя, Богу помолися,// Твоего Покрова праздник в
Церкви Русстей прославльшия.

Катавасия: *Седяй в славе:*

Песнь 5

Ирмос: *Слово Божие Всесильное,/ мир всему миру
посли/ и светом истинным освещая и просвещая вся,/
из нощи Тя славящия.*

Добрый учителю вертограда духовнаго/ светлаго и
богопросвещеннаго града Казани,/ верный
возвестителю пути спасительнаго,/ истинный
хранителю апостольских преданий,/ столпе
непоколебимый,/ страдальче за Христа предивный,/
священномучениче Анатолие, явился еси.

Никтоже возможе отлучити тя от любви Божия, славный Иоасафе,/ егда же Господь в годину лютую гонений на Церковь Божию/ призва тя к служению святительскому,/ мужественный защититель паствы своея был еси.

Иоасафе, Чистопольская похвало и адеманте наша Церкви,/ преемниче Анатолия славнаго,/ споспешниче Кирилла богомудраго,/ с обоими бо ныне в чертозах Божиих предстоиши/ и молитвенник о пастве своею являеши.

Стецемся во обитель Свяжскую,/ идеже подвигом добрым подвизася святитель Амвросий,/ и честную его икону обстояще, воззовем:/ радуйся, страдальче неодоленный,/ радуйся, обители твоей щит и ограждение,// радуйся, небесный сродниче наш.

Кто воспое твои подвиги, Амвросие отче наш,/ наставник явился еси многим,/ апостол и учитель явился еси земли Корейския,/ и земля Казанская тобою хвалится,/ светильниче Елабужский и Сарапульская славо,/ молитвенный покров ныне сим градом бывая.

Многия святая израсти земля наша,/ земли Русския предстателей ко Христу дарова,/ с сими прославим святителей и мучеников единокровных/ Алексия, Никиту, славных Бугульминских архипастырей.

Богородичен: Во Успении Твоем нас не оставляеши,/ во обителях древних земли наша монаси пения гробу Твоему приносят,/ Пренепорочная Мати.

Катавасия: *Ужасошася всяческая:*

Песнь 6

Ирмос: *В Церковь небесную святую Твою да придет молитва моя,/ вопию Ти, яко Иона, из глубины сердца морскаго:/ от грех моих возведи мя,// молюся Тебе, Господи.*

Кия песни принесем священномучеником нашим во пресвитерех Богу послуживших?/ Иже страдания мужественно претерпеша,/ венцы Небесныя стяжаша:/ Темже любовью память сих светло торжествуем.

Небоязненно стал еси в защиту веры Православныя, священне Димитрие,/ и, не устранившись сильных мира сего,/ исповедал еси истину Божию даже до крове.

Служитель неленостный явился еси, отче Филарете,/ в вертограде духовнем служа,/ овцы словесных окормляя, пастырски работав,/ темже мученически за Христа пострадал еси.

Пастырское служение в Чистопольских пределах добре совершая/ и ревностию о Бозе распалаяся,/ верныя небоязненно исповедати веру во Святую Троицу призывал еси/ и смерть мужественно сретил еси, отче Михаиле.

Душегубцы пагубнии кровь твою пролиша,/ ты же за Христа достойно смерть приял еси,/ древним мучеником подобяся, Павле, отче наш,/ со чады твоими мученических венцев удостоился еси,/ Елабужская красото.

В пределах Марийских новомученицы явистася/ пастырие и усерднии к Богу молитвенницы,/ Адриане и Михаиле честнии,/ сего ради и за веру Христову убиение прияли есте.

Богородичен: Сын убо Твой, Всечистая,/ даровал естъ верным Божественнаго лика Своего нерукотворенное изображение,/ Ты же, Дево Всеблаженная,/ миру честную Твою икону оставила еси.

Катавасия: *Божественное сие и всечестное:*

Кондак святых, глас 3.

Подобен: Дева днесь:

Днесь лик святых земли нашае предстоит Престолу Божию/ и усердно молит Спаса нашего Бога и Заступницу Усердную:/ святителие и преподобнии покланяются,/ мученицы со исповедники ликовствуют,/ нас бо ради молят сродницы наши,/ спастися рабом Своим.

Икос:

Едема Небеснаго граждане бысте,/ приидите, почудимся подвигом святых земли нашае;/ приидите,

воспоим сущия сродники, иже во граде нашем:/ тамо явишася светлыя лучи,/ сияющии паче луч солнечных житием своим,/ тамо обретесе бисер честный и многоценный,/ из негоже лик святых многих сплетесе;/ тамо подвижницы непоколебимии явишася:/ святителие древнии и многопетии,/ священномученицы во святительстве и пресвитерстем чине послужившии,/ преподобнии отцы, нам мудрии наставницы показавшиися,/ мученицы древнии и новии, венцы Небесныя удостоенныя,/ нас бо ради молят сродницы наша,/ спастися рабом Своим.

Песнь 7

Ирмос: *Пламень пещный порабóтиша благочестивии отроцы,/ тем свыше ороси я, готовы палимы по естеству,/ но паче естества мужески пояху:/ благословен еси, Господи, на престол Славы Царствия Твоего.*

Отцы преподобныя земли наша восхвалим днесь,/ сие бо подобает воспети угодники Божия,/ тесным путем шествовавших,/ духовнаго велиара победивших/ и многия иноки возрадивших.

Пророчески прорекл еси, преподобне Макарие:/ свету евангельскому подобает приити на землю нашу,/ и во многих святых возсияти!/ Темже и ныне благословением твоим пустынь Свияжская хвалится.

От юности, богомудре, Гаврииле, просветився любовью Христовою,/ суетный и многомятежный мир

оставил еси./ Житие свое вверя предстательству
Пречистыя Богородицы,/ слез потоки изливал еси пред
пречистым Ея образом/ и теченьми их седьм езер
освятил еси,/ старче наш.

Измлада Духом Святым наставляемь,/ в
Седмиезерную пустынь вселился еси, преподобне отче
Гаврииле,/ отонудуже многия наставляя,/ мудрый
наставник монахов/ и чадолюбивый отец всем явился
еси.

Чадо Господне возлюбленное, чудная Елисавето
преподобномученице,/ вкупе с телесною красотою и
величием княжеским/ духовною добротою украсилася
еси,/ старца Гавриила советы исполняючи.

Христу последовав и славу земную презрев,
преподобне отче Александре,/ во обитель
Седмиезерную вселился еси,/ идеже, премудростию
Божиею напитався,/ исповедник земли нашае явился
еси.

Богородичен: Не имама языка, во еже изрещи вся
благодеея Твоя, Богородительнице,/ от всяких бед и
болезней свободдаемса,/ иконою Твоею укрепляеми,
тоу обитель Седмиезерная украшается.

Катавасия: Не послужиша твари богомудрии:

Песнь 8

Ирмос: *Крепцы отроцы трие суще,/ силою
оболкшеса Святыя Троицы,/ уловиша и победиша
халдеи,/ и дивно изменися естество:/ како огонь в росу*

*прелазашеся?/ Без туги я сохрани, яко пленами./ О,
проливый мудрость на всех делах Твоих Боже,/ Тя
превозносим во веки.*

Преподобномученицы Зилантовы,/ Пастыреначальнику Христу последующе,/ веру истинную, яко щит, сохранили есте / и, с любовью ближним послуживше, // даже до крове пострадали есте.

Вашу память достолично почитаем,/ Сергие, Лаврентие, Серафиме, Феодосие,/ Леонтие, Стефане, Георгие,/ Сергие, Иларионе, Иоанне,/ преподобномученицы святии,/ монаси Успенския обители славныя.

Адаманти избранныи Богом от земли Казанския явистеся,/ преподобномученицы Иосифе, Антоние и Сергие,/ Варлааме, Иове и Петре Раифстии,/ яко воины Христови добропобеднии.

Молитвами вашими обители земныя не оставляете,/ мученичества кровьми и постничества трудами венчаеми./ Темже и покастесе мучеников и преподобных единовсельницы,/ преподобномученицы наши.

Яко цветник духовный, обитель Богородицкую, соделали есте, отцы Раифстии,/ ныне же, предстояще Престолу Божию,/ не престайте о нас молиться.

Христа яко Небеснаго Жениха возлюбивши,/ вся красная мира сего оставила еси,/ ангельскому житию

поревновала еси,/ обитель твою земную украшаючи,/ паче же о горней обители помышляючи,/ Мензелинская свеще возженная, Маргарито всехвальная.

Троичен: О, Троице Честная,/ прими, яже приносит Ти земля Казанская,/ яко начатки и яко фимиам избранный,/ вся угодившия Ти и прежде, и послежде, знаемыя и незнаемыя,/ и молитвами их от всякаго вреда страну Русскую сохрани.

Богородичен: Тебе, Избранней от всех родов, Божией Матери,/ благодарственная пения приносим,/ пришествием честных Твоя иконы, раби Твои, Богородице, озаряеми,/ но, яко имущая державу непобедимую,/ от всяких нас бед свободи, да зовем Ти:// радуйся, Невесто Неневестная.

Катавасия: *Отроки благочестивыя в пеци:*

Песнь 9

Ирмос: *Из Едема изыде род наш прабабы ради Евы,/ призван же Тобою, рождшею нам новаго Адама — Христа,/ во двою естеству, Дево Чистая./ Взыграся Адам прадед, яко избыв первыя клятвы,/ мы же Тобою хвалящися,/ яко Тебе ради Бога познахом, и Тебе величаем.*

Приидите мучениколюбцы вси,/ духовно возвеселимся, и торжествуим:/ днесь бо предлагают трапезу тайную мученицы земли наша,/ веселящую

празднолюбцев нас, еже вопити к ним:/ радуйтесь
страстотерпцы непобедимии.

Днесь, благовернии людие, сошедшеся,
восхвалим добляго сего мученика и страдальца
Авраамия,/ сей бо, укрепляемь силою Божиею,/ душу
свою положи за Христа,/ много пострадав от
зловерных болгар./ Сего ради от Господа венец прият/
и ныне молитвенник к Нему о нас бывает.

Страстотерпче святой Иоанне,/ блаженна земля
Казанская, напившаяся крове твоея,/ Христа бо со
дерзновением проповедав,/ многия муки от неверных
агарян приял еси,/ страданьми своими противных
дерзости низложив,/ Троицы поборник явился еси.

Отца и Сына и Святаго Духа исповедал еси, святе
Петре,/ агарянское нечестивое учение,/ отменяя сих не
словом токмо, но и делом,/ смерть бо приял еси.

Агарянская отрасль был еси, Стефане,/ но тех
неверие отменяя, прилепился еси Христу,/ молитвами
пресвитера Тимофея исцеление получив,/ и крещение
приял еси вскоре,/ доблий страстотерпец земли наша
явился еси.

О велиции сродницы наши,/ Небеснаго Сиона
достигшии/ и велию славу от Бога приимшии,/ утешение
нам, в скорби сущим, испросите,/ страну
нашу в благочестии утвердите/ и люди расточенныя
соберите,/ от нас, яко дар, песнь благодарения
приемлюще.

Богородичен: Юже поют вси земнороднии и славословят вся силы Небесныя,/ от всех верно поклоняемую,/ Заступницу Усердную рода христианскаго,/ и мы, Ю благодаряще, прославим.

Катавасия: *Всяк земнородный:*

Светилен святых, глас 1:

Новомученицы и исповедницы земли Казанския,/ молитесь о нас Всеблаженную Богородицу,/ да и мы посреде искушений и бед/ сохраним свет веры Православныя во вся дни живота нашего.

Слава, ин светилен, глас тойже:

Вкупе со святыми земли наша хвалу вам воздадим,/ святии Феодоре, Давиде и Константине, Ярославстии чудотворцы,/ страну Казанскую и Болгарскую попечением при жизни не оставили есте,/ тако и ныне молим вы,/ почитающим память вашу заступники будите.

И ныне, Богородичен, глас тойже:

Светоносная Слова Палато,/ Ковчеже, позлащенный Духом,/ явилася еси, Пресвятая Дево,/ великия ради чистоты./ Темже молим Тя вкупе со святыми сродники нашими:/ Христу молися от страстей очистити/ православно Богородицу исповедающих Тя.

На хвалитех стихиры святых 4, глас 8.

Подобен: О, преславнаго чудесе:

О, преславнаго чудесе!// Днесь ликует земля Казанская,/ память святых своих празднующи,/ иже духовная дарования источают обильно./ Темже, с любовью к ним возопиим:/ о, теплии молитвенницы наши ко Господу,/ испросите нам прощение согрешений/ и, яко звезды непрелестнии,// путеводители к Царствию Небесному.

О, преславнаго чудесе!// Днесь ликует земля Казанская/ прославляющи святители и священномученики,/ иже в житии израстиша прекрасный плод благочестия/ и, яко ваия благоуханная процветше,/ любовь евангельскую нам явиша./ Тех молитвами, Христе Боже,/ не отвержи нас от лица Твоего// и даруй нам мир и велию милость.

О, преславнаго чудесе!// По тридесяти и двою летех/ в земли нетленной обретошася/ мощи Гурия святителя,/ верху мира, якоже губа носящияся./ О, какво дарование новому чудотворцу даровася!// С прочими святыми земли своя ныне в чертозех Небесных предстоит,/ Ихже молитвами, Христе,// спаси души наша, яко Един Милосерд.

О, преславнаго чудесе!// Днесь ликует земля Казанская/ благодатию новомученик и исповедник своих красующися,/ иже души и телеса многонедужная врачуют./ Темже и мы, духовно радуящися,/ Господа дивнаго во святых Своих прославляем:/ именовании и именовании сродницы наша,/ на ваше

предстательство надеюща, / Христа Бога нашего
молитв даровати нам велию милость.

Слава глас тойже:

Приидите вси духовне возвеселимся о памяти
святых: / се бо прииде радость велия земли нашей. /
Темже во гласе радости, и чистой совести возопиим,
глаголюще: / радуйтеса, святителей сословие, / иже
Евангелие Христово граду нашему проповедавшем, / яко
мрежницы, и ловцы человек бысте, / красны ваша
ноги равноапостольныя. / Радуйтеса, мучеников
собори, / веру исповедавших даже до смерти, / мук
томления претерпевшии, / и в годину лютую
совершенно страдания венец приемшии. / Радуйтеса,
преподобномученицы, отцев наслаждение, / своя
тела пощением истаявшем, / и умертвившем страсти
плотския, / ум божественным рачением вперистем,
исповедничеством и муками Богу угодившии, / на
Небеса возлетесте и, со ангелы водворяющеса, /
восприяте вечная благая. / Но о святители, мученицы
с постницы и праведницы, / вас Венчавшаго прилежно
молитв, / избавитися от враг видимых и невидимых, / в
вере и любви совершающим присно честную память
вашу.

И ныне, Богородичен, глас тойже.

Подобен: О, преславнаго чудесе:

О, преславнаго чудесе! / Небесе и земли Царица, /
от святых сродников наших умоляемая, / до ныне

землю Русскую покрывает/ и лика Своего изображении милостивно обогащает./ О, Владычице Державная!/ Не престани и на будущее время/ во утверждение на Руси Православия/ милости и чуда изливати до века. Аминь.

Славословие великое. Ектении и отпуст.

На Литургии

Блаженны от канона песни 3-я и 6-я. Прокимен, глас 7: Восхвалятся преподобнии во славе,/ и возрадуются на ложах своих. Стих: Воспойте Господеви песнь нову, хваление Его в церкви преподобных. Апостол ко Евреям, зачало 334. Аллилуиа, глас 2: Священницы Твои облекутся в правду,/ и преподобнии Твои возрадуются. Стих: Бог прославляемь в совете святых. Евангелие от Иоанна, зачало 51. Причастен: Радуйтесь, праведнии, о Господе,/ правым подобает похвала.

Молитва

К вам, святии сродницы и заступницы наши, святии вси, в земли Казанстей просиявшии, усердно ныне прибегаем и припадающе молимся: предстательством вашим теплым и милостивым не оставите нас, чад ваших, во гресех и искушениях дни своя на земли иждивающих. О, Небеснаго отечества граждане! Не забудьте нас, граждан земнаго отечества вашего, и яко приснии наши ходатаицы и молитвенницы, испросите нам от Великодаровитаго

Бога грехов прощения, в житии христианством наставления и укрепления, в проповеди Евангелия Христова помощи и поспешения, да и мы трудом и подвигом вашим подражаем, о святителии наши равноапостольнии, отцы наши преподобнии и богоноснии, мученицы наши крепцыи и непобедимии. Испросите граду нашему Казани, отечеству нашему и всей вселенной мир и благословение, нам же, память вашу с любовью почитающим, благочестие в житии и в вере укрепление, в делах же благих преуспевание, да и мы вкупе с вами и со всеми святыми, изрядно же со Усердною Заступницею рода христианского Пречистою Девею Богородицею, непрестанно славим и величаем пречестное и великолепое имя Живоначальныя и Божественныя Троицы, Отца и Сына и Святаго Духа, ныне и присно и во веки веков. **Аминь.**

СОБОР КАЗАНСКИХ СВЯТЫХ

Празднуется 4 (17) октября.

Установлен в 1984 году по инициативе епископа Казанского и Марийского). Совершается в день праздника обретения мощей святителей Гурия и Варсонофия.

Утвержден Святейшим Патриархом Московским и всея Руси Кириллом 26 января 2015 года по

представлению Синодальной комиссии по канонизации святых.

Текст данной службы составлен членами богослужебной комиссии Санкт-Петербургской епархии с участием преподавателей Санкт-Петербургской Духовной Академии протоиерея Феодора Гуряка и чтеца Сергея Забавнова. Текст утверждён на Заседании Синодальной богослужебной комиссии, отправлен на утверждение в Священный Синод.

Святые, упоминаемые в текстах службы **(празднование – 4 / 17 октября)**

- Сщмч. Ермоген, патриарх Московский (+1612) – память 17 февраля / 2 марта, а также 12 / 25 мая (прославление), 5 / 18 октября (Собор Московских свт.).
- Свт. Гурий, архиепископ Казанский (+1563) – память 5 / 18 декабря, а также 4 / 17 октября (обретение мощей), 20 июня / 3 июля (перенесение мощей).
- Свт. Герман, архиепископ Казанский (+1567) – память 6 / 19 ноября, а также 25 сентября / 8 октября (перенесение мощей), 23 июня / 6 июля (второе перенесение мощей).
- Свт. Варсонофий, епископ Тверской, Казанский чудотворец (+1576) – память 11 / 24 апреля, а также 4 / 17 октября (обретение мощей).
- Сщмч. Кирилл (Смирнов), митрополит Казанский (+1937) – память 7 / 20 ноября.
- Сщмч. Анатолий (Грисюк), митрополит Одесский (+1938) – память 10 / 23 января.
- Сщмч. Иоасаф (Удалов), епископ Чистопольский, викарий Казанской епархии (+1937) – память 19 ноября / 2 декабря.
- Сщмч. Амвросий (Гудко) Свияжский, бывш. епископ Сарапульский (+1918) – память 27 июля / 9 августа.
- Сщмч. Димитрий (Шишокин), пресвитер Казанский (+1918) – память 27 сентября / 10 октября.

- Сщмч. Филарет (Великанов), пресвитер Казанский (+1918) – память 11 / 24 октября.
- Сщмч. Михаил (Вотяков), пресвитер Чистопольский (+1931) – память 5 / 18 июня.
- Мч. Авраамий Болгарский (+1229) – память 1 / 14 апреля, а также 9 / 22 марта (перенесение мощей во Владимир) и в Неделю 4-ю по Пасхе (о расслабленном).
- Мч. Иоанн Казанский (+1529) – память 24 января / 6 февраля, а также 2 / 15 октября (местное празднование памяти Казанских мучеников – день взятия Казани в 1552 г.)
- Мч. Петр Казанский (+1552) – память 24 марта / 6 апреля, а также 2 / 15 октября (местное празднование памяти Казанских мучеников – день взятия Казани в 1552 г.)
- Мч. Стефан Казанский (+1552) – память 24 марта / 6 апреля, а также 2 / 15 октября (местное празднование памяти Казанских мучеников – день взятия Казани в 1552 г.)
- Прп. Александр (Уродов) исповедник, архимандрит Седмиезерный (+1961) – память 14 / 27 августа, а также 5 / 18 сентября (обретение мощей).
- Прмчч. Зилантовы: архимандрит Сергей (Зайцев), иеромонах Лаврентий (Никитин), иеромонах Серафим (Кузьмин), иеродиакон Феодосий (Александров), монах Леонтий (Карягин), монах Стефан, послушники Георгий Тимофеев, Сергей Галин, Иларион Правдин, Иоанн Сретенский – братья Зилантова Успенского монастыря г. Казани (+1918) – память 28 августа / 10 сентября.

- Прмц. Маргарита (Гунароуло), игумения Мензелинская (+1918) – память 9 / 22 августа.
- Свв. блгв. кнн. Феодор, Давид и Константин Ярославские чудотворцы (XIV в.) – память 5 / 18 марта (обретение мощей 1463 г.), 19 / 2 октября.
- Прп. Макарий Желтоводский (+1444) – память 25 июля / 7 августа.
- Сщмч. Адриан Троицкий (+1938) – память 3/16 февраля .
- Сщмч. Михаил Березин (+1938) – память 31 декабря / 13 января.
- Сщмч. Павел Дернов (+1918) – память 14 / 27 февраля.
- Сщмч. Алексей, архиепископ Омский (+1937) – память 22 августа / 4 сентября.
- Сщмч. Никита, епископ Орехово-Зуевский (+1937) – память — 6 /19 ноября.
- Прпмц. Елисавета (+1918) – память 5 / 18 июля.
- Св. прав. Иоанн Кронштадтский (+1908) – память 20 декабря / 2 января

**Местночтимые святые, отсутствующие в
официальном Православном церковном календаре
Московского Патриархата:**

- Прмчч. иеромонахи Иосиф (Гаврилов), Сергей (Гуськов), Антоний (Чирков), Варлаам (Похилюк), Иов (Протопопов) и послушник Петр (Тупицын) – насельники Раифской Богородичной пустыни Казанской епархии (+1930) – память 14 / 27 января.

(Канонизированы (местно) по благословению Святейшего Патриарха Алексия II в 1996 г.)

- Прп. Гавриил (Зырянов) Седмиезерный (+1915) – память 24 сентября / 7 октября.
(Канонизирован (местно) по благословению Святейшего Патриарха Алексия II в 1997 г.)

Кроме того, в Казанской епархии особо почитается общецерковно прославленный святой –

Свт. Филарет (Амфитеатов; в схиме Феодосий), митрополит Киевский (+1857) – память 21 декабря / 3 января.

(Был архиепископом Казанским в 1828-1836 гг., много потрудился в деле миссии среди раскольников и иноверцев в Казанской епархии)

В утвержденный Патриархом Кириллом список Собора Казанских святых он включен не был из-за формальных критериев: в условиях частых перемещений архиереев в синодальную эпоху 8-летнее служение на Казанской кафедре признано «незначительным» по сравнению с его киевским периодом жизни. Несмотря на это, он продолжает почитаться в Казани как «свой» святой.

В прежних версиях Месяцеслова Казанской епархии присутствовали имена таких подвижников, как:

преподобные Иона и Нектарий Казанские,

святитель Ефрем, митрополит Казанский,

архиепископ Епифаний Иерусалимский,

мученик Феодор Болгарский,

Казанские мученики Борис, Сильван, Иаков, Феодор, Василий и др.

Включение их в местные Святцы было признано ошибочным, поскольку они никогда не были официально канонизированы ни на общецерковном, ни на местном уровне, а посему их почитание как канонизированных святых и совершение в их честь богослужений (кроме заупокойных) отныне не благословляется.